



Republika e Kosovës
Komuna e Drenasit
Kuvendi i Komunës

12 Nr. 352-37739 dt. 03.07 2018



Duke u bazuar në nenin 11,12 paragrafi 12.2 pika c ,nenin 40 parafrasi 40.2 pika a të Ligjit Nr.03/L-040 për vetëqeverisje Lokale,nenit 5 pika p nenit 34 pika 34.6 dhe nenit 82 pika c të Statutit të Komunës së Drenasit ,Kuvendi i Komunës së Drenasit në mbledhjen e mbajtur më dt.27.06.2018 aprovoi këtë:

RREGULLORE
PËR VARREZAT, OFRIMIN E SHËRBIMEVE TË VARRIMIT ,RREGULLIMIN DHE
MIRËMBAJTJEN E TYRE NË TERRITORIN E KOMUNËS SË DRENASIT(GLLOGOCIT)

I. DISPOZITAT E PËRGJITHSHME

Neni 1
Qëllimi

1. Me këtë rregullore përcaktohen kushtet e përgjithshme për varrezat, ofrimin e shërbimeve të varrimit, rregullimin dhe mirëmbajtjen e varrezave në Komunën e Drenasit (Gllogocit),
2. Rregullimi, mirëmbajtja e varrezave dhe varrimi, janë veprimtari komunale të interesit publik.

Neni 2

Përkufizimet

1. Me këtë rregullore termat e mëposhtme kanë këto kuptime:
 - 1.1. “Vend-varrezë” nënkuptojmë varrin dhe varrezat familjare.
 - 1.2. “Varr” nënkuptojmë gropën e gërmuar në tokë për të futur të vdekurin (kufomën) ose mbetjet mortore.
 - 1.3. “Varrezë” nënkuptojmë vendin/hapësirën ku varrosen të vdekurit, e cila përfshinë anën e brendshme (hapësira për të futur të vdekurin dhe hapësira tjetër përcjellëse) dhe anën e jashtme e cila përfshinë (hapësira qarkulluese, e parkimit dhe e shërbimeve tjera).
 - 1.4. “Varrmihës” nënkuptojmë punëtorin që hap varre në varreza.

- 1.5. "Varrim" nënkuptojmë ceremoninë e përcjelljes të vdekurit për në varr.
- 1.6. "Varrhumbur" nënkuptojmë humbjen e varrit, që nuk dihet se ku është varrosur.
- 1.7. "Kufomë" është trupi i njeriut, i privuar nga funksionet jetësore.
- 1.8. "Shërbimi i varrimit" është veprimtaria që zhvillohet nga subjektet publike ose private, nga çasti i vdekjes deri në varrimin e kufomës.
- 1.9. "Zhvarrim" është nxjerrja e kufomës dhe/ose mbetjeve mortore nga varri.
- 1.10. "Zhvarrim i zakonshëm" është zhvarrimi që kryhet pas përfundimit të kohës së prehjes.
- 1.11. "MAPL" është Ministria e Administrimit të Pushtetit Lokal.
- 1.12. "DSHPE" është Drejtoria e Shërbimeve Publike dhe Emergjencë.
- 1.13. "Ekshumimi" -zhvarrosje, nxjerrja e kufomës nga varri.
- 1.14. "Zhvarrim i jashtëzakonshëm" është zhvarrimi që kryhet para përfundimit të kohës së prehjes, sipas procedurave ligjore, për ekspertizë kriminalistike, për arsye transferimi në një varr tjetër, pas një periudhe të paracaktuar kohe ose për interes publik.
- 1.15. "Kohë e prehjes" është koha gjatë së cilës nuk lejohet zhvarrimi i zakonshëm i kufomës.

Neni 3

Varrezat

1. Në aspektin e hapësirës dallojmë këto varreza:
 - 1.1. varreza të vogla (deri në 5 ha).
 - 1.2. varreza të mesme (prej 5 deri në 20 ha) dhe
 - 1.3. varreza të mëdha (mbi 20 ha).
2. Hapësirat e përcaktuar për varreza duhet të jenë të parapara me planet Urbanistike, ose me plan të veçantë në pajtim me planet urbanistike.
3. Varrezat duhet t'i përmbushin nevojat për varrosjen e të vdekurve në një vendbanim (fshat), disa vendbanime dhe brenda lagjeve lokale në qytet.
4. Lokacioni apo vendi i varrezave e caktohet me vendim të Kuvendit të Komunës së Drenasit.

Neni 4

1. Ndërtimi i varrezave të reja dhe zgjerimi i varrezave ekzistuese përcaktohet me plan dhe programin për mirëmbajtjen e masave për rregullimin e gjendjes në hapësirë.
2. Planin dhe programin përfshinë periudhën se paku 100 vjet për varreza të reja, kurse për zgjerimin e varrezave ekzistuese më së paku 30 vjet me mundësi të zgjerimit në etapa.

3. Varrezat ekzistuese mund të zgjerohen, nëse për to ekziston hapësira e paraparë me planin zhvillimor të komunës dhe nëse janë të siguruara edhe kushtet tjera të parapara me këtë rregullore dhe me ligjet në fuqi .

Neni 5

1. Sipas mënyrës së themelimit, respektivisht mënyrës së vdekjes, varrezat klasifikohen në të përgjithshme (publike) sipas përkatësis fetare dhe të veçanta.
2. Në varreza të veçanta hyjnë: varret me përmendore, varret ushtarake, varret e heronjve dhe dëshmorëve, varret anonime, varret masovike prej fatkeqësive natyrore .

Neni 6

1. Sipërfaqja e nevojshme neto për varr duhet të jetë 2. 20 metra katror për banor.
2. Te përcaktimi i sipërfaqes për varr, duhet llogaritur bruto dhe neto sipërfaqen e varrit.
3. Sipërfaqja neto e varrit, përfshinë parcelën/vendin e varrit.
4. Sipërfaqja bruto e varrit, përfshin neto sipërfaqen e varrit të rritur edhe për distancën në mes varreve.

Neni 7

1. Varrezat duhet vendosur në një vend me sipërfaqe të mjaftueshme, i përshtatshëm sipas konfiguracionit dhe kushteve të lokacionit për varrosje.
2. Vendi i varrezave duhet të jenë jashtë vendbanimit ose afër vendbanimit me qasje në rrugë dykrahëshe dhe me shtegun (rrugicë e ngushtë) e ndarë për këmbësorë.
3. Hapësira për varreza duhet t'i përmbush këto kriterë:
 - 3.1 Sipas pozitës së varrezave toka duhet të jetë e kulluar, me rreze dhe e qetë të jenë larg rrjedhave nëntokësore dhe sipërfaqësore të ujërave, dhe jashtë këtyre zonave: zonave të ujërave të mbrojtura, zonave të cilat vërshohen nga ujërat, zonave të mbrojtura të trashëgimisë natyrore dhe rajoneve malore.
 - 3.2 Varrezat e reja duhet të jenë së paku 50 m nga rruga automobilistike respektivisht qendra të ndërtuara ose që do të ndërtohen, ndërtesa të dedikuara për çështje afariste.
 - 3.3 Tek zgjerimi i varrezave ekzistuese, largësia duke pasur parasysh pikën 3 të nenit 7, mund të jetë deri në 10 m me kusht që për gjatë varrezave të sigurohet një shirit gjelbërues në gjerësi minimale prej 5 m i cili e përshkon tërë gjatësinë e objekteve kontaktuese.

Neni 8

1. Varrezat përbëhen prej:
 - 1.1 Vendit të varrit (vetë varri) .
 - 1.2 Radhët e varrezave të cilën e përbëjnë një mori varresh (varret) .
 - 1.3 Fushat e varrezave (disa rende të varreve por jo më tepër se 200 varre në një shteg) .
 - 1.4 Shtegu i cili lidh grupet e varreve me fushën e varreve ose rendin e varreve .
 - 1.5 Shtigjet kryesorë të cilat lidhin fushat e varreve, me pushimore dhe hapësirën për zgjerim.
 - 1.6 Rrugëve interne dhe eksterne (jashtme) për qarkullimin e automjeteve dhe parkimin .
 - 1.7 Gjelbërimet (grupe dhe përcjellëse) .
 - 1.8 Vendi ku bëhet përshëndetja e fundit lamtumirës, mund të jetë i mbyllur ose i hapur në përputhje me rregullat sipas përkatësisë fetare.
 - 1.9 Objektet tjera përcjellëse shërbyese për kufomën (hapësirën për pastrim, qëndrim deri në varrosje, kroi i ujit, ndriçimi dhe pajisje tjera të nevojshme sanitare) .
 - 1.10 Parkingu për automjete .

Neni 9

1. Varri është gropa e varrit me proporcion sipas normave urbanistike:
 - 1.1. 1.00 x 0.60 m – deri në moshën 3 vjet.
 - 1.2. 1.50 x 0.60 m – 1.50 x 0.75 m prej moshës 4 vjet deri në moshën 10 vjet.
 - 1.3. 2.10 x 0.70 m – 2.50 x 1.20 m mbi 11 vjet.
2. Fundi i gropës së varrit sipas grupeve të përcaktuara në paragrafin 9.1 të kësaj rregulloreje, duhet të jetë më së paku 50 cm mbi nivelin e pikës më të lartë të ujërave nëntokësore.
3. Thellësia e varrit përcaktohet në bazë të rregullave sipas riteve fetare e që nuk mund të jetë më e thellë se 180 cm.
4. Dimensionet e varrezave familjare janë 2.40 x 2.80 m, maksimalisht 4 varreza.
5. Mbulesa e varrit mbi kufomë, duhet të bëhet sipas riteve fetare, por jo më shumë se 0.8 m.
6. Lartësia e varrezave familjare dhe e përmendoreve mund të jetë më shumti deri në 2 m. Në to mund të shënohen atributet e personit të vdekur (emri, mbiemri, viti i lindjes dhe i vdekjes).

Neni 10

1. Varri mund të bëhet edhe me mur prej betoni ose prej materiali tjetër.
2. Varrezat duhet të jenë të renditura në atë mënyrë që rendet e varrezave të mos të jenë më të gjata se 60 m.

3. Fushat e varrezave përbëhen prej rrethesh të varrezave dhe distancës ndërmjet tyre që shërben si shteg për me shkuar deri te varri.
4. Fushat e varrezave duhet të jenë të ndara me shtigje kryesore me gjatësi minimale prej 3 m.
5. Shtigjet duhet të jenë të ndërtuara prej materialit të fortë pa pengesa për lëvizje dhe jo më të pjerrtë se 8% ndërsa tërthorazi jo më pjerrtë se 1%.

Neni 11

Me rastin e varrosjes, duhet të mbahet evidenca nga ana e organit kompetent (DSHPË-së) respektivisht ndërmarrja publike ose ndërmarrjes tjetër e specializuar për këtë çështje të autorizuar.

Neni 12

1. Në pajtim me nenin 8 pika (9) të kësaj rregullore, objektet tjera përcjellëse shërbyese duhet të kenë hapësirën për pastrim, qëndrim deri në varrosje, kroi i ujit, ndriçimi dhe pajisje tjera të nevojshme sanitare), mund të jetë: me shufra metalike me bazament ose material tjetër bashkëkohor, ndërtohen në bazë të një plani të veçantë në pajtim me planin e përgjithshëm të varrezave.
2. Hapësira për qëndrimin e kufomës duhet të jetë e ndërtuar me norma teknike.
3. Parkingu i automjeteve, duhet të jetë jashtë varrezave dhe i ndarë nga rruga publike.
4. Rrugët e këmbësorëve – shtigjet rregullohen si trotuare të pavarura për qasje deri te vend varrimi dhe të përshtatshme për kalim për personat me karrocë (hendikep).

Neni 13

Mirëmbajtja e varrezave

1. Organi kompetent i administratës (Drejtoria e Shërbimeve Publike dhe Emergjencë), administron me shërbimin e varrimit, rregullimin dhe mirëmbajtjen e varrezave në qytet dhe fshatra, nëse ndryshe nuk është e rregulluar me ligj.
2. Të gjitha varret dhe varrezat do të trajtohen me ndershmëri dhe dinjitet nga komuna.
3. Në pajtim me paragrafin 2 të këtij neni, të gjithë banoret do të kenë qasje të barabartë në ofrimin e shërbimeve komunale sipas kushteve të parapara me këtë rregullore.

Mjetet e nevojshme për Shërbimet e varrimit, rregullimin dhe mirëmbajtjen e varrezave

Neni 14

1. Shërbimet e varrimit, rregullimi dhe mirëmbajtja e varrezave në territorin e Komunës i kryen ndërmarrja publike ose ndërmarrja tjetër e specializuar për këtë qëllim.
2. Shërbimet fetare i kryen bashkësia fetare.

Neni 15

1. Punët në vështirim të nenit 14 (pika 1) e kësaj rregulloreje rregullohen me kontratë administrative në pajtim me rregullat për prokurimin publik dhe shërbimeve publike.
2. Shpenzimet për shërbime të varrimit kryhen nga Komuna, nga kategoria (mallra dhe shërbime) e buxhetit të komunës, për të gjithë banorët e komunës së Drenasit.
3. Me leje të DSHPE-së, rregullimin e varrit mund ta bëjë edhe anëtar i familjes së të vdekurit.

Neni 16

1. Mirëmbajtja e varrezave, në vështirim të kësaj rregulloreje përfshinë: objektet tjera përcjellëse shërbyese (hapësira për qëndrim të kufomës), ndriçimin publik, rrugët kalimtare, shtigjet, kroin për ujë, rrethojën e varrezave, parkingun e automjeteve, stabilimentet sanitare, gjelbërimin, pastërtinë dhe rendin në varreza.
2. Mirëmbajtja (disa punë zejtare) në varr dhe varreza familjare mund të bëhen nga ndërmarrja publike ose ndërmarrja tjetër e specializuar për këtë çështje, përjashtimisht edhe nga vetë familjarët e të vdekurit në këto kushte:
 - 2.1. Të merret leja nga ana e organit kompetent (DSHPE-së) ose ndërmarrja publike e autorizuar.
 - 2.2. Koha e kryerjes së punëve duhet të jetë prej orës 7 – 18:00 në ditët e punës.
 - 2.3. Materiali ndërtimor (rëra, zhavorri, hekuri dhe materiali tjetër) lejohet të qëndrojë në varreza për kohë të shkurtër në mënyrë që të mos pengojë lëvizjen e vizitorëve në varreza dhe pas kryerjes së punëve duhet të kthehet në gjendjen e mëparshme.
 - 2.4. Transporti i materialit, duhet të bëhet vetëm nëpër rrugë dhe shtigje që i cakton dhënësi i lejes.
 - 2.5. Gjatë punimeve nëse haset në ndonjë pjesë të arkivolit ose ndonjë ashtë (kockë) duhet të mbulohet në të njëjtin vend.
 - 2.6. Nëse gjatë punimeve gjinden sende me vlerë duhen t' i dorëzohen Organit kompetent (DSHPE-së).
 - 2.7. Kroi, gjatë përdorimit duhet të përdoret me kujdes që mos t'ju shkaktohet dëmi varreve dhe varrezave tjera.
 - 2.8. Për vendosjen e pllakave përkujtimore ose përmendoreve, duhet të paraqitet kërkesë e veçantë me skicën e objektit, respektivisht përmendores dhe vërtetimin se është siguruar shfrytëzimi i vendvarrimit.

3. Shpenzimet lidhur me kryerjen e punëve sipas paragrafit 2 të këtij neni bien në barrë të atij i cili bënë kërkesën për mirëmbajtje të varrit dhe varrezave familjare.

Neni 17

1. Planin e mirëmbajtjes së varrezave, kushtet dhe tarifat i cakton DSHPE-ja.
2. Për tarifa nxirret vendim i veçantë nga ana e Kuvendit të Komunës – apo me rregulloren për taksa, tarifa dhe gjoba me propozim të DSHPE-së.

Neni 18

Vizitat në varreza

1. Vizituesit e varrezave janë të detyruar që në varreza të sillen me dinjitet në vendet ku ato prehen.
2. Varrezat mund të vizitohen në çdo kohë, përpos nëse vendoset orar i veçantë.
3. Në varreza nuk mund të vijnë fëmijët deri në moshën 10 vjeçare, përjashtimisht me përcjelljen e prindërve, personave tjerë të moshuar ose kujdestarit të tij.

Neni 19

1. Në varreza ndalohet:

- 1.1. Shkatërrimi me qëllim i vendvarimeve.
- 1.2. Shkelja dhe kapërcimi nëpër varre dhe varreza dhe shlyerja tyre.
- 1.3. Shkaktimi dëmit në varreza ose në shenjat tjera përkujtimore (në përmendore dhe objekte tjera përkujtimore në varreza).
- 1.4. Prishja e rendit në varreza.
- 1.5. Thyerja e rrethojave në varreza, dëmtimi i sipërfaqeve të gjelbëruara, drunjtëve dhe bimëve tjera të mbjellura në varreza.
- 1.6. Hyrja në hapësirën e varrezave me automjete dhe mjete tjera tërheqëse pa pëlqim paraprak ;
- 1.7. Lëshimi i bagëtive në varreza.
- 1.8. Krijimi i papastërtisë në shtigjet dhe në sipërfaqet e gjelbëruara, vërja ose hedhja e kurorave të vyshkura, luleve të vyshkura ose sendeve tjera.
- 1.9. Fotografimi pa leje i varrezave për çështje profesionale.
- 1.10. Sjellja dhe lërja pa leje e sendeve të ndryshme në varre dhe varreza që nuk kanë të bëjnë me varre dhe varreza.

- 1.11. Hyrja në objektin ku qëndron kufoma dhe objektet tjera jashtë kohës së përcaktuar për varrim;
- 1.12. Ndezja e qirinjve jashtë shtëpizave të parapara në varreza.
- 1.13. Qëndrimi i lypsarëve brenda dhe në hyrje të varrezave.
- 1.14. Hedhja e mbeturinave brenda në varreza dhe jashtë varrezave.
- 1.15. Zjarrvënia e qëllimshme brenda varrezave.

Neni 20

DSHPE-ja cakton rregullat e sjelljes në pajtim me nenin 17 të kësaj rregulloreje dhe duhet publikuar në vend të dukshëm në hyrje të varrezave.

Neni 21

Varrimi dhe veprimet tjera lidhur me varrimin

1. Varrimi bëhet në pajtim me dispozitat sanitare edhe sipas mënyrës që i përgjigjet pietetit ndaj të vdekurit, në sajë të nderimit të ndjenjave të farsisë dhe të personave tjerë të cilët kanë qenë në afërsi me të vdekurin.
2. Varrimi duhet të bëhet vetëm pasi të jetë vërtetuar vdekja në mënyrë të caktuar me dispozita të veçanta.
3. Varrimi i të vdekurit mund të bëhet pas konstatimit të personit të autorizuar- Mjekut.
4. Varrimi i të vdekurit mund të bëhet edhe në varrezat të cilat i ka caktuar i vdekuri për së gjalli, ose në varrezat që i zgjedhë familja e tij ose personat të cilët kujdesen për varrosjen e tij.

Neni 22

Lejen për varrimin e të vdekurit në varrezat e caktuara dhe për vendvarrim në qytet dhe fshat e jep DSHPE-ja, respektivisht ndërmarrja publike ose ndërmarrja tjetër e specializuar e autorizuar, si dhe në koordinim me zyrën e gjendjes civile në komunë (te konsultohet Ligji për gjendje civile),

Neni 23

1. Bartja (transporti) i kufomave behët me automjete të veçanta që i plotësojnë kriteret për këtë veprimtari.
2. Deri në aktin e varrosjes kufomat duhet të ruhen në lokale të caktuara për këtë qëllim.
3. Bartja e kufomave deri të varrezat bëhet sipas rregullave të riteve fetare të komuniteteve.

Neni 24

Bartjen e kufomave në territorin e komunës e bënë ndërmarrja publike e specializuar komunale ose ndërmarrja tjetër e specializuar e kontraktuar për këtë qëllim apo nga ana e vetë familjarëve.

Neni 25

Para varrimit, kufomat e personave të merituar, heronjve dhe dëshmorëve dhe personave tjerë me merita të veçanta, mund të ekspozohet në vendin e caktuar jashtë varrezave me qëllim të dhënies së nderimit të veçantë të pasvdekjes, nëse organizimi i vdekjes bëhet nga organet komunale ose organet qendrore të shtetit.

Neni 26

1. Nëse veprimtaria e varrimit organizohet nga ndërmarrja publike lokale ose ndërmarrja tjetër publike e specializuar, është e detyruar që për varrimin e të vdekurve të sigurojë shërbimin e përditshëm, duke përfshirë edhe të dielat dhe festat shtetërore siç vijon:
 - 1.1. Prej 1 majit deri me 30 shtator prej orës 8 deri në orën 18:00 më së voni deri në ora 20:00;
 - 1.2. Prej 1 tetorit deri më 30 prill prej orës 8 deri në ora 16:00, më së voni deri në ora 18:00.
2. Veprimtaria e varrimit sipas paragrafit 1 të këtij neni, rregullohet me anë të kontratës në mes të komunës dhe ndërmarrjes publike lokale të specializuar ose ndërmarrjes tjetër të specializuar për këtë qëllim.

Neni 27

Dhënia e nderimit të fundit të (pasvdekjes) mund të bëhet në hapësirën e përcaktuar në vend-varreza.

Neni 28

1. Me lejen e organit kompetent komunal (DSHPE-së) ,inspeksionit sanitar, dhe personit tjetër të autorizuar , mund të bëhet zhvarrosja (nxjerrja) e mbetjeve të kufomës për t'u bartur – rivarrosur në një vend-varrezë tjetër ose për çështje tjera (ekshumacionin e kufomave).
2. Lidhur me pikën 1 të këtij neni mbahet procesverbali nga ana e organit kompetent (DSHPE-së) ose personit tjetër të autorizuar për këtë çështje dhe i nënshkruar nga palët.
3. Shpenzimet lidhur me punën rreth zhvendosjes dhe çështjeve tjera (ekshumacionin e kufomave) bien në barrë të vetë atij i cili ka kërkuar zhvendosjen e mbetjeve të kufomës ose për çështje tjera (ekshumacionin) .

Neni 29

Mbikëqyrja

1. Mbikëqyrjen në zbatimin e dispozitave të kësaj rregulloreje e bënë organi kompetent për çështje të shërbimeve komunale (DSHP-ja) si dhe inspeksioni (përkatës).
2. Inspeksioni gjatë mbikëqyrjes mund të marr masa dhe të urdhërojë marrjen ose mos marrjen e një veprimi të caktuar në pajtim me dispozitat e kësaj rregulloreje dhe dispozitat e aplikueshme të ligjit;
3. Në vendimin e inspeksionit mund të ushtrohet ankesa në afatin prej 30 ditësh nga dita e njohfimit, drejtuar Kryetarit të Komunës.

DISPOZITAT NDËSHKIMORE

Neni 30

1. Për shkelje te nenit 16 paragrafi 2, nenit 19 paragrafi 1 nënparagrafët , 1.1 – 1.15 dënohen për kundërvajtje me gjobë:
 - 1.1.Personi fizik në shumën prej 20€-200€;
 - 1.2.Personi i biznesit individual prej 50€-400€;
 - 1.3.Personi përgjegjës i personit juridik prej 50€-400€
 - 1.4.Personi juridik prej 50€- 400€.



DISPOZITAT KALIMTARE DHE PËRFUNDIMTARE

Neni 31.

Çdo dispozitë e kësaj rregulloreje që bie ndesh me ligjet në fuqi epërsi do të kenë dispozita ligjore.

Neni 32.

Kjo rregullore hynë në fuqi 15 ditë nga dita e protokollimit në MAPL dhe publikimit në Web-faqën e Komunës.

 **Kryesuesi i Kuvendit të Komunës**

Labinot Halilaj